

太平寰宇記

第七冊

太平軍字記

卷之七

太平寰宇記卷之二十二

河南道二十二

海州

海州

東海郡今
理朐山縣

禹貢徐州之域書曰海岱及淮惟徐

州東至海北至岱南及淮虞舜亦爲徐州之境周
無徐州併爲青兗州則爲青州之域周官職方氏
青州浸曰沂沭按沭在今沭陽縣界春秋魯國之
東界詩魯頌泰山巖巖魯邦所瞻遂荒大東至于
海邦淮夷來同海邦卽今海州之地七國時屬楚
秦兼六國以爲薛郡後分爲郯郡漢爲東海郡後

漢至晉改爲東海國後魏改東海爲郟郡高齊郡
縣俱廢宋明帝失淮北地于鬱洲更置冀州梁改
東海郡爲北海郡武帝末年大江以北並附于魏
武定七年改青冀二州爲海州移理于舊州南龍
沮故城隋開皇三年自琅邪城移州于今理大業
三年罷州爲郡唐武德四年臧君相以郡歸順復
爲海州置總管府領海漣環東楚四州海州領朐
山龍沮新樂曲陽沭陽厚邱懷仁利城東海九縣
六年改新樂爲祝其七年以東楚州屬揚州又以
沂州來屬八年廢環州及龍沮祝其曲陽厚邱利

城五縣仍以廢環州之東海來屬九年廢漣州貞觀元年罷都督府天寶元年改爲東海郡乾元元年復爲海州

元領縣四

朐山 東海 懷仁 沭陽

州境

東西一百九十八里 南北二百九十里

四至八到

西北至東京一千四百六十里

西北至西京一千八百八十五里

西北至長安二千七百四十五里

東至東海縣水道九十里

南至泗州五百四十里至揚州七百里

西至下邳縣五百五里至徐州五百六十里

北至密州三百八十四里

西南取流陽宿遷徑至泗州五百里

東南至漣水軍取官河水路三百四十里陸路二百五十里

東南至楚州四百一十里

西北至沂州二百七十里

東北至東海縣界八十里

戶

唐開元戶二萬三千七百二十八

皇朝戶主六千八十八客七千二百四十六

風俗

同沂州

姓氏

東莞郡四姓

臧

關一作關

何公孫

人物

蕭望之

東海蘭陵人

王肅

東海郯人朗之子

繆斐

東海胸人也其

先楚元王大夫繆生避難居此

繆襲

鮑照

東海人詩入文選

何無

忌東海鄉人桓玄曰何無忌劉牢之甥酷似其舅何承天東海鄉人何遜

承天曾孫孟卿東海人以禮學傳二戴蕭惠開東海蘭陵人明

識過人嘗有三千沙門一閱其名退無所失徐勉東海鄉人六歲能屬文為吏部尚書

徐擒梁朝為左衛率鮑泉東海人撰新儀二十卷徐弘敏字有

功東海人則天時官至司刑卿凡活者五百家盧黃門曰當雷霆之振能全仁恕千載未見其儔嘗

據法廷諍張文成贊曰躡虎尾而莫驚觸龍鱗而不懼鳳峙鳴臬之內直以全身豹變豺狼之閒忠

能遠害吳通玄海州人與弟通微德宗時同為翰林學士

土產

綾絹海味鹽楚布以其地當楚分其布精好故名紫

菜產在郡東北五十里海畔石上舊貢也

胸山縣

舊二鄉
今四鄉

本漢胸縣也屬東海郡秦始皇立石

海上以爲秦東門闕有鐵官後漢屬東海國晉不改宋志無胸縣按此前胸縣今縣西九十里故胸城是也梁于今縣北二里琅邪故城置招遠縣屬琅邪郡後屬魏改爲胸縣高齊不改周武帝建德六年改琅邪爲胸山郡改胸縣爲胸山縣取界內胸山爲名也隋開皇三年廢郡縣屬海州大業三年以海州爲東海郡縣仍屬焉 碩濩湖在縣南一百四十二里神異傳曰秦始皇時童謠云城門有血城將陷沒有一老母聞之憂懼每旦往窺城

門門傳兵縛之母言其故門傳兵乃殺犬以血塗
門上母往見血便走須臾大水至郡縣皆陷老母
牽狗北走六十里至伊萊山得免西南隅今仍有
石屋名爲神母廟廟前石上狗跡猶存高齊天統
中此湖遂竭西南隅有小城餘址猶存繞城古井
有數十處又有銅鐵瓦器如塵肆之所乃知縣沒
非虛 龍沮故城在縣南六十里 鍾離昧故城
在縣南百里項羽將鍾離昧所築昧卽此縣人也
植石廟在縣北四里史記曰始皇三十五年立
石東海上胸界中以爲秦東門今石門猶存傾倒

爲數段在廟北百許步今尙可識其文曰漢桓帝
永壽元年東海相任恭修理此廟 盧石山在縣
東南六十里按漢書云韓信爲楚王都下邳又曰
韓信鎮于三盧石伊句等三山石色黑因以爲名
伊盧山一名大伊萊山在縣南七十五里按史
記云項王亡將鍾離昧家在伊盧徐廣曰東海朐
縣又按續郡國志東海朐縣有伊盧鄉又云中盧
盧石在東句盧在西故云中盧又名伊萊者盧萊
二字相近流俗音訛爾實伊盧也 句盧山一名
馬鞍山山在縣西南一百二里縣在山東史記所

傳縣有三盧之山形勾曲狀似馬鞍 孔望山在縣西南一百六十里春秋□□□□云此山與郟城相近當是孔子之郟問禮之時因登此山遂以名之其山上有嵌石其下方平可坐十餘人山前石上有二盆故老相傳云秦始皇洗頭盆盆邊髮隱隱并山上馬跡猶存 螭山在縣東南二百里其山在海中四面平坦潮上半沒潮落方見故其上多螭卽螺蚌之類也 胸山在縣南二里按舊經云秦始皇東巡至胸山界此時已有胸山之名南墜星山在縣南六十里古老相傳云商時星

墜于此又有北墜星山在縣東五十里並高一里
羽山在縣西北九十里漢志東海郡祝其縣羽
山在縣南鯀所殛處也 羽潭在縣西九十里去
羽山一百步一名羽池左傳云鯀化爲黃熊入于
羽淵淵東有羽山池上多生細柳野獸不敢踐又
郡國志云鍾離昧城南有羽泉亦殛鯀之處其水
恆清牛羊不飲 流水在縣西一百四十里按水
經注云流水出琅邪東莞縣西北大弁山流經沂
州沂水縣西南入泗州下邳縣 永安堤在縣東
二十里唐開元十四年七月三日海潮暴漲百姓

漂溺刺史杜令昭課築此堤北接山南環郭連綿
六七里 韓信堰在縣西十里相傳云韓信爲楚
王時以地洿下遂立此堰今爲大路 廢沂州城
在縣西北百四十步按輿地志云宋泰始三年失
舊沂州至五年于朐山東北僞置沂州至泰豫元
年移朐縣就沂州後周建德六年改沂州爲朐州
隋開皇四年省今城基存 曲陽故城漢縣故城
在今郡西南一百一十里後漢省唐武德四年復
置八年又省 平曲故城漢縣莽曰端平卽漢書
以此封公孫渾邪之所又宣帝封廣陵厲王子曾

爲侯後漢省在今縣界 故朐城漢爲縣今廢城
在縣西南 古盧王城在縣西九里按輿地志云
漢舊朐縣今海州是也宋泰豫元年移朐山縣于
廢沂州又梁典云天監十年三月盜殺朐山戍主
劉晰引虜徐州刺史盧昶遣振遠將軍馬仙琕討
之盧昶自徐州以兵來援朐山屯兵據此城權假
王號自稱盧王因名盧王城 古摩坡城在縣南
按梁典云天監十年遣振遠將軍馬仙琕來討朐
山至十二月克之盧昶挺身走仙琕遣張惠紹追
之斬首十萬造此城 牛欄村郡國志云糜竺放

牧之所今民祭猶呼糜堆 東安故城在郡西八
十三里漢縣後漢省 糜竺冢郡國志云刻石爲
人馬禽獸之狀名之爲鬼市

東海縣

東水路九十里依舊二鄉

本秦末田橫所保鬱洲亦曰郁

州亦謂之田橫島爲贛榆縣地宋泰始三年失淮
北于鬱洲上僑立青州卽此地仍于州北一里置
東海郡并縣焉卽今縣又改爲北海後入于魏魏
改青州爲海州仍移理龍沮城復于此置臨海鎮
尋移東海入鎮城仍領廣饒一縣後周建德四年
又增置東海縣隋開皇三年廢東海郡及東海縣

因移廣饒縣于廢郡界仁壽元年改廣饒爲東海
縣唐武德四年于此置環州以水環繞爲郡名領
東海青山石城贛榆四縣八年州廢仍廢青山石
城贛榆三縣入東海縣移縣于廢州城卽今理也
謝祿山在縣城西一里按漢書云王莽時東海
徐宣謝祿等擊王莽將田況大破之曾屯兵于山
因名 蒼梧山在縣東北二里古老相傳此山在
海中後飛至此 栖雲山在縣東北四十一里卽
巨平山之東嶺按州舊記梁國子祭酒明山賓父
僧紹當齊武帝時以國子博士徵不就遁迹于此